



Selasa, 19 Januari 2021

Ogen: Jeremia 42:1-6



TOTOKENLAH KAMI



Nabi Jeremia tuhu-tuhu sekalak serayan siipake Tuhan ras siikelengiNa. Sebab erbage-bage kiniseran sinderpa ia, tetap ia megenggeng pernah atena ngadi ngerana tapi la terngadikenca. Tuhan pe tetap make ia janah ncidahkan ketuhu-tuhun kataNa semasa Jeremia nggeluh. Ibas ogenta enda icidahken maka Jeremia ndatken pembelaan Tuhan. Ija nai asum e isehkenna nubuat kerna keruntuhen Jerusalem, ukumen Dibata man bangsa si la patuh ras kai dampakna adi bangsa e la nggit jera ras mpebelin gegehna jine, kerina kel anak bangsa e nogan ia, ernembekh ate bana. Tapi gundari kenca nggo jadi kerina sinikatakena, mulihken bangsa e man Jeremia. Jadi me kebalikenna, ija adi simbarenda nulak kai sikatakken Jeremia, nguru-nguru ras mpesega-sega Jeremia tapi genduari reh me bangsa enda guna mindo gelah itotokenna. Dem pengarapenna segelah arah toto Jeremia jadi simehuli man bana. Arah si jadi e banci ikatakken maka situhuna anak bangsa e tek maka Tuhan erdahin arah Jeremia. Ntahsa lanai lit iakapna cara sideban seakaten ndahi Jeremia. Pernah nge kita bagi Jeremia enda? Icedai kalak ukurta tapi gundari pindona ka penampatta? Umpamana guna notoken ia? DIkune jadi e kai responndu? Adi tuhu-tuhu kin kita anak Tuhan, nggit nge kita. Pas bagi Jeremia ndai. Itotokenna lit 10 wari dekahna ia ertoto kerna siipindoken anak bangsa e arah puanglima-puanglima. Kalak singgit notoken imbang-imbangna ngena ate Tuhan, em tanda maka Kesah si Badia enggo erdahin bas pusuhtha. Sitotoken kalak sinakiti kita, sebab perlu kel ia itatang gelah simehulilah sinilakokenna man kalak sideban. Sitotoken imbangta labo gelah ia cilaka, tapi gelah ndatken jamahan Tuhan, lit pertobatan ras perubahren jadi bas geluhna, lawatan Tuhan jadi bas geluhna, gelah malem pinakitna, terlebih gelah itandaina Dibata singkelini ia.